

Jangan harap bantuan orang lain, kata Musa

KOTA BHARU, Khamis — Pemangku Perdana Menteri, Datuk Musa Hitam, menyeru para usahawan Bumiputera supaya menambah usaha mereka bagi mencapai kejayaan dalam bidang masing-masing tanpa mengharap bantuan dari pihak lain.

Beliau berkata demikian dalam kata-kata aluannya sempena seminar *Kejayaan dan Cabaran Peniaga-Peniaga Melayu* selama tiga hari, bermula hari ini, di Kem Kijang dekat sini.

"Harapan saya ialah lebih ramai lagi peniaga Bumiputera akan berkemampuan meneroka jalan bagi diri sendiri," katanya.

Datuk Musa menambah, kerajaan pimpinan Datuk Seri Dr Mahathir Mohamad akan terus berusaha mewujudkan iklim sihat untuk meningkatkan aneka kegiatan ekonomi dan mempelbagaikan peluang-peluang bagi Bumiputera.

Beliau berharap seminar itu akan dapat membantu usahawan Bumiputera menghadapi cabaran dan mencapai kejayaan yang lebih

gemilang.

Yang Dipertua Dewan Perniagaan dan Perusahaan Melayu Malaysia, Dr Nawawi Mat Awin, dalam kata-kata aluannya, berpendapat para usahawan yang menyertai seminar itu akan dapat memahami perkembangan dunia perusahaan dengan lebih jelas lagi.

"Ramai antara mereka masih belum begitu faham atau sedar akan kesan dasar-dasar kerajaan yang membabitkan usahawan," tambahnya.

Beliau berharap usahawan akan dapat mengenal pasti segala cabaran yang harus mereka hadapi dalam dunia perniagaan.

Katanya, mereka perlu memikirkan strategi untuk menghadapi cabaran itu.

Seminar itu dianjurkan oleh Dewan Perniagaan dan Perusahaan Melayu Malaysia cawangan Kelantan dengan kerjasama Bank Perwira Habib.

Menteri Perdagangan dan Perindustrian, Tengku Ahmad Rithauddeen, merasmikan seminar itu hari ini.